



सरकारं जारी या:गु म्हसीकापौ कयना: मतदान याय्फइगु निर्वाचन सुरक्षाया नितिं सेना परिचालन याइगु

लहना वा:पौ/ निर्वाचन आयोगं थ्वहे वइगु मंसिर १६ गते जुइगु स्थानीय तह उपनिर्वाचनया नितिं सरकारं जारी यानात:गु थीथी सरकारी भ्वं कयना: न मतदान याय्फइगु व्यवस्था या:गु दु। आयोगया प्रवक्ता निता पोखरेलं जारी या:गु विज्ञप्तिइ उगु खँ न्हयथनात:गु खः।

निर्वाचन आयोगया कथं मतदाता नामावली नां दुथ्या:पि मतदातातयसं सवारी चालक लाइसेन्स, नेपाली नागरिकताया प्रमाणपत्र, मतदाता परिचय पत्र, राष्ट्रिय परिचय पत्र, पासपोर्ट, स्थायी लेखा नम्बरया परिचय पत्र दुपिसं मतदान याय्फइगु खँ धा:गु दु। मतदानया नितिं थ्व फुककं परिचय पत्रया सकल प्रति ज्वना वय्मा:गु खँ न निर्वाचन आयोगं धा:गु दु।

थ्व हे इवल्य स्थानीय तह उपनिर्वाचन-२०८१ यात कया: निर्वाचन आयोगं या:गु निर्णयतयगु कार्यान्वयनया अवस्था, उपनिर्वाचन आचारसंहिताया पालना व उकिया विषयस ला:गु उजुरी व प्राप्त जानकारी व निर्वाचन व्यवस्थापनया थीथी पक्षतयगु बारे नियमित रुपय् जानकारी कया: तत्कालं हे समस्या



समाधान याय्गु आज्जु निर्वाचन सुरक्षा व्यवस्थापन निर्देशिका, २०७८ या दफा ४ कथं सोमवा:निसैं निर्वाचन लिच्वः पित मव्यूतलेया नितिं निर्वाचन आयोगय् संयुक्त निर्वाचन संचालन केन्द्र स्वेगु दु।

उगु केन्द्रया संयोजक निर्वाचन आयोगया छ्याज्जे रविलाल पन्थ ल्य:गु दुसा दुजलय् आयोगया प्रशासन महाशाखा प्रमुख सहसचिव नारायणप्रसाद सापकोटा, गृह मन्त्रालयया सहसचिव ऋषिराम तिवारी, नेपाली सेनाया महासेनानी

सुवास खड्का, राष्ट्रिय अनुसन्धान विभागया सह-अनुसन्धान निर्देशक नरेशबहादुर शाह, नेपाल प्रहरीया प्रहरी बरिष्ठ उपरीक्षक दिपक रेग्मी, सशस्त्र प्रहरी बल नेपालया सशस्त्र प्रहरी वरिष्ठ उपरीक्षक दिग विजय सुवेदी, आयोगया उपसचिव दुर्गा प्रसाद चालिसे व सदस्य-सचिवकथं आयोगया उपसचिव डा. थानेश्वर भुसाल च्वनादीगु दु।

उकथं हे निर्वाचन आयोगं मतदान जुइगु न्हि कुन्हु अनुमति मकासे सवारी साधन चले मयायूत इनाप नं या:गु दु। आयोगं अनुमति मका:से

सवारी साधन चले यात धा:सा २५ हजार तका जरिवाना जुइगु खँ नं धा:गु दु।

आयोगं निर्वाचन कसुर तथा सजाय ऐन, २०७३ या दफा २५ (१) स निर्वाचन प्रचारया इवल्य दल, उम्मेदवार, निर्वाचन प्रतिनिधिपिसं आयोगं क्व:छिनात:गु ल्या: स्वयां अप्व: व आयोगं वा निर्वाचन अधिकृत अनुमति बिउगु बाहेक सवारी साधन मख्यलेत नं इनाप या:गु दु।

उकथं हे सवारी साधनय् लाउड स्पीकर तथा: चुनाव प्रचार प्रसार

यानाच्चंगु सुचं व:गु धासैं अज्या:गु सवारी साधन नियन्त्रणय् कया: मा:गु कारबाही यायूत स्थानीय प्रशासनयात निर्देशन नं बिउगु दु।

निर्वाचनया इवल्य शान्ति सुरक्षा कायम यायूगु नितिं सरकार सेना नं छु यल्लिगु जूगु दु। उकिया नितिं राष्ट्रपति रामचन्द्र पौडेलं स्वीकृत बीधुकूगु दु। निर्वाचनयात सुरक्षित, भयरहित, निष्पक्ष लिसे शान्तिपूर्ण रुपय् क्वचायेकेगु नितिं मन्त्रिपरिषदया सिफारिसय् राष्ट्रपति पौडेलं सेना परिचालनया नितिं स्वीकृत बिउगु खः।

उपनिर्वाचनय् सेना परिचालन यायूत प्रधानमन्त्री केपी शर्मा ओली वंगु २०८१ मंसिर ६ गते राष्ट्रपतियात सिफारिस या:गु ख:सा राष्ट्रपति पौडेलं संविधानया धारा ६६ उपधारा (२) कथं सेना छ्यलेगु नितिं स्वीकृत बिउगु जानकारी राष्ट्रपति कार्यालयया प्रवक्ता शैलाजा रेग्मी भट्टराई जानकारी बियादीगु दु। मंसिर १६ गते देय्नुयंकया ४१ गू स्थानीय तहलय् उपनिर्वाचन जुइत्यंगु दु।

थ्वहे इवल्य निर्वाचन आयोगं मतदान जुइगु न्हि कुन्हु निर्वाचन जुइगु ल्यं७ पेजय्

नेपाल संवत् राष्ट्रिय मौलिक संवत : राष्ट्रपति पौडेल



लहना वा:पौ/ राष्ट्रपति रामचन्द्र पौडेलं ऐतिहासिक कालं निसैं नेपाली जनताया धार्मिक, सांस्कृतिक व सामाजिक जीवनलिसे सतितक दुगु नेपाल संवत् नेपा:या राष्ट्रिय व मौलिक संवत् जूगु खँ धयादीगु दु। नेपाल संवत्या प्रवर्तक शंखधर साख्वा:यात राष्ट्रिय विभूति घोषणा या:गु नीत्यादै क्यंगु लसताय् राष्ट्रपति भवन शीतल निवासय् ग्वसा: ग्व:गु ज्याइवल्य न्ववानादिसैं राष्ट्रपति पौडेलं थ:गु देय्ना नामं स्थापना जूगु विश्वया हे छगू जक

संवत् नेपाल संवत् जूगु धासैं थ्व संवत् नेपाली जनताया गौरवमय राष्ट्रिय सम्पदा जूगु खँ धयादिल।

वय्कलं धयादिल, 'बहुभाषिक, बहुसांस्कृतिक, बहुजातीय देय् नेपा:या सांस्कृतिक विविधतायात एकताया सूत्र अक्षुण्ण यानातयूत नेपाल संवत्या भूमिका महत्वपूर्ण जू धयागु जित: ता:।' राष्ट्रपति पौडेलं शंखधर साख्वा:नं थ:म्ह आर्जन यानागु निजी सम्पत्तियात समाजया गरिब व उत्पीडित समुदायया हितय् छ्य:गु ल्यं७ पेजय्





नेवा: राष्ट्रिय म्ये

चमि : दुर्गालाल श्रेष्ठ लय् चिनामि : तिर्थ माली

धुन देने धुन सँन्त्यलं भी फुक्कं हे छम्ह जुइ धुन
भीगु लागाय् भी स्वयं हे ज: जुया धुन लुइ धुन
ह्यांगु भुमिइ अष्टमण्डल ह्यांगु चा: दुने थी नगु
भीगु नेवा: ध्वाँय् थ्व हे ख: ज्यान भी सकस्यां छगू
जातितय् स्वायत्त राज्यं लुइ कपं च्वय् भिलिमिलिं
राष्ट्र भ:भ: धाय्क न्ह्याके भीगु च:तिं भीगु हिं

सम्पादकीय



सभामुखय् लुमंकेमा:म्ह दमनाथ ढुंगाना

मानव अधिकारवादी नेता नाप पूर्व सभामुख दमनाथ ढुंगाना आ: भीगु न्ह्य:ने मन्त । अयून वय्कलं स्वीकार यानादीगु विचा: व ज्याखँपाखें स्थापित मूल्य मान्यता व वय् क:या योगदान न्ह्याबलें भीसं लुमंकेमा: । मनुखं थ:गु भिंगु कर्म हे पृथ्वीया शरीर भस्म जुइधुंका: नं मनूयात म्वाकातइ । छाय् धा:सा अज्या:पिं मनूतय्गु योगदान देय् व जनताया सार्वजनिक लुमन्तिइ जुयाच्चनी । सार्वजनिक पदय् च्वनादीगुलिं जक वय् क:यात लुमंकेगु वा लुमंकेमा:गु धइगु मखु । छगू ला वय् क: ८३ दँया जीवनय् स्वदँ तक (२०४८ निसैं २०५१ तक) प्रतिनिधिसभाया सभामुख जुयादीगु ख: ।

वय्क:यात लुमंकेमा:गु धइगु सभामुख जुयादीगु इलय् वय्कलं तयादीगु विचा: व म्हितादीगु भूमिकां उगु पदया मर्यादा थहां वंगु ख: । तर वय्क:या व्यक्तित्वया म्हसिका नेपा:या समाज, मानव अधिकार व सीमान्तकृत समुदायया लोकतान्त्रिक व प्रगतिशील रुपान्तरणया पक्षय् हरेक आन्दोलन व संघया पक्षधर कथं निर्माण जूगु धका: धाय्छि । शान्ति व न्यायया निरतिं मदिव्क स: तयाच्चनादीम्ह वय्क:या छवि न्ह्याबलें न लुमकाबी । थ्व ल्याखं स्वल धा:सा दमननाथ ढुंगाना नेपा: व नेपाली समाजय् सदां म्वानाच्चनी ।

२०४६ स लोकतन्त्र पुन:स्थापना जुइधुंका: स्वयंगु ख:सा आ:तक यक्व मनू प्रतिनिधिसभाया सभामुख जुइधुंकागु दु । प्रधानमन्त्री थ:गु खँ नाप व पार्टीया हितय् ज्या याय्त स्वइपि जक सभामुख दय्केगु व इनापया आधारय् थ:गु भूमिका निर्वाह याइपिं सभामुखत दय्केगु स्वइ । तर ढुंगाना सत्तारुढ दलया उत्पीडनयात थाय् मब्यूम्ह सभामुख जूगु दु । संसदीय व्यवस्थाय् सरकार सत्तारुढ दलया व संसद विपक्षी दलया ख: धका दमनाथ ढुंगानां धायेगु या: नाप वहे कथं न ज्या या:गु खनेदु । वया लिपा जुइ सभामुख जूपिस थ्व व्यवहारय् या:गु खनेमदु । पार्टीया हितसिबें च्वय् थहां वना: संसदीय व संवैधानिक मूल्य मान्यतापाखें विचलित मजूसे थ:गु भूमिका निर्वाह यानादिल । राजनीतिक विवाद समाधान यायेगु मू थाय् संसद ख: धइगु मान्यताप्रति वय्क:या निष्ठाया कारणं वय्कलं फुक्क विपक्षी दलतय्त संसदय् हय्त प्रेरित यानादीगु ख: । वय्क:या भूमिकाया हुनिं सरकारं ज्या याय्मा:, संसद प्रतिपक्ष जुइमा: धइगु मान्यता दुगु ख: ।

राजनीतिक दलया शीर्ष नेतातय्गु कारणं गबलें गबलें संसदया आलोचना जुइगु अवस्थाय् वय्क:या भूमिका महत्वपूर्ण जक मखु, शिक्षाप्रद नं जूगु दु । काग्रेस पार्टीपाखें प्रतिनिधिसभाय् निर्वाचित जुयादीम्ह ढुंगाना सभामुख जुइधुंका: काग्रेस पार्टीयात समस्या व:सां वय्कलं गुगु अडान कयादीगु ख:, व वय्क:या इमान्दारिताया संकेत जुइ । थ्व भूमिकाया माध्यमं वय्क:या व्यक्तित्व भन जक थहां वंगु दु । थुकथं लोकतन्त्र धा:पिसं वय्क:पाखें लोकतन्त्र छु ख: व उकिया अर्थ छु ख: धइगु सीके फइ । वय्क:या जीवनं प्रेरणा काय्फइ कि लोकतन्त्रय् थीथी बिचा:यात निषेध मदु ।

सामाजिक संजालया प्रभाव



नूपेन्द्रलाल श्रेष्ठ

थौंया ई धइगु डिजिटलया युग ख: । हलियकं याउँक छगू थासं मेगु थासय् अपुक व याउँक स्वापू तय्गु माध्यम ख: सामाजिक सञ्जाल । थौकन्ह्य: सुं नं मनू थुगु सामाजिक सञ्जालपाखे तापाक च्वनेफुगु मदु । सूचना व संचारया विकास व विस्तारं थौं सु मस्त, सु ल्याय्म्ह, सु बुराबुरी थुकियात छ्यला बुलाय् हयाच्वंगु हे दु । हलिन्यंक खँ ल्हाय्त अपगु माध्यम ख: थौकन्ह्य: सामाजिक सञ्जाल ।

लोकतान्त्रिक शासन प्रणालीया खुल्ला व उदारवादी प्रावधानया दुरुपयोग याना: अपराधया प्रवृत्ति अप्वय्केगु कुत: जुयाच्वंगु घटनात आपालं दु । थज्या:गु अवस्थाय् राज्यया सम्बन्धित निकायं समाधानया निरतिं गम्भीर पला: न्ह्याकाच्वंगु दु । लिपांगु घटना कथं स्वयंगु ख:सा मेडिकल ब्यवसायी दुर्गा प्रसाईपाखे सामाजिक सञ्जाल दुरुपयोग या:गु द्धपनय् प्रहरीं ज्वनेगु ज्या तक जुल । प्रधानमन्त्री केपी शर्मा ओलीविरुद्ध नक्कली दस्तावेज छ् यला: भ्रम बिइगु ज्या या:गु गम्भीर द्वपं बिया प्रसाईयात वया:गु छँ वना: ज्वंगु ख: ।

प्रसाईयात आ: सामाजिक सञ्जाल दुरुपयोग याना: अपराध या:गु द्वपं ला:गु दु । नेपाल प्रहरीया केन्द्रीय अनुसन्धान ब्युरो छवपया मध्यपुर थिमि निकोसेरापाखें प्रसाईयात गिरफ्तार या:गु ख: । प्रसाई प्रधानमन्त्री ओलीयात गम्भीर द्वपं ब्यूगु ख: । थ्व

याय्गु, अपमान याय्गु वा छम्ह व्यक्तियात थुज्व:गु हे मेगु छुं नं ज्या याइम्ह बाय् याके बीम्हेसित छगू लख तका जरिवाना बाय् न्यादँ तक जेल सजाय बाय् निगुलिं सजाय जुइ । यदि दोषी ठहर जुल धा:सा जरिवाना व जेल सजाय नितानं जुइफु । सामाजिक सञ्जालया दुरुपयोग या:गु धासैं प्रसाई थ्व सिबें न्ह्य: नं प्रहरी हिरासतय् का:गु ख: । मिसा चरित्र हत्या या:गु उजुरी वयेवं असोज ६ गते प्रसाईयात प्रहरीं गिरफ्तार या:गु ख: । उगु इलय् प्रसाईयात न्यान्हु तक हिरासतय् तया: छगू लख तका धरौटीइ त्व:तूगु ख: ।

काठमाडौंया जिल्ला अदालतय् थ:गु गलत ज्या स्वीकार याना: धरौटीइ त्व:तूसां वय्क: विरुद्धया मुद्दा अभ्र नं विचाराधीन जुयाच्वंगु दु । सामाजिक सञ्जालया दुरुपयोग या:गु द्वपनय् हाकनं गिरफ्तारीइ लायेधुंका: वय्क: विरुद्धया मुद्दा भन गम्भीर जूगु खनेदु । कीर्तया मुद्दाय् मुलुकी संहिता-२०७४



सामाजिक सञ्जालपाखे सुचं, मनोरञ्जन, ताजा सुचंया आदान प्रदान, सीप प्रवर्द्धन, व्यवसायिक फाइदा नाप मेमेगु निरतिं नं उपयोगी जुया वयाच्वंगु दु । थुकिं याना: यक्वसितं बौद्धिक व प्राज्ञिक फाइदा जुयाच्वंगु दु । सामाजिक सञ्जाल मानव सभ्यताया विकासय् यक्व कथं उपयोगी जूसां नं दुरुपयोग नं व्यापक रुपं जुयाच्वंगु दु । सामाजिक सञ्जालया दुरुपयोगं आपालं भ्रम न्यंकेगु, अपराध अप्वय्केगु, ठगी याय्गु, मेपिनिगु हत्या याय्गु आदिं समाजय् छगू कथं त्रास ब्वलनाच्वंगु दु । नेपालय् तकं जुयाच्वंगु थज्या:गु दुर्व्यवहार गम्भीर हाथ्या जुया बिउगु दु । थ्व छगू गम्भीर बिषय जुयाच्वंगु दु । हलिन्यंकं छगू हाथ्या जुयाच्वंगु दु ।

नेपालय् नं स्वयंगु ख:सा सामाजिक सञ्जाल छ्यला: थ:गु निहित स्वार्थ पूर्वकेगु ज्या अप्वया वनाच्वंगु दु । थुकिइ राज्य संयन्त्र व आम नागरिकं अनेक कथंया उत्पीडनया सामना याय्मा:गु अवस्था व:गु दु । सामाजिक सञ्जालं गुलि मनूतय्त नागरिक अधिकार व स्वतन्त्रता याय् गुलि ज्या या:गु दुसा गुलिसित धा:सा नागरिक अधिकारपाखें बञ्चित याय्गु कुत: जूगु दु । सामाजिक सञ्जालपाखे मानहानी अप्वया वनाच्वंगु दु ।

सामाजिक सञ्जालया दुरुपयोगं आपालं भ्रम न्यंकेगु, अपराध अप्वय्केगु, ठगी याय्गु, मेपिनिगु हत्या याय्गु आदिं समाजय् छगू कथं त्रास ब्वलनाच्वंगु दु । नेपालय् तकं जुयाच्वंगु थज्या:गु दुर्व्यवहार गम्भीर हाथ्या जुया बिउगु दु ।

हे हुनिं प्रसाई विरुद्ध कीर्ते व विद्युतीय अपराध नियन्त्रण ऐन अन्तर्गत कसुर या:गु मुद्दाय् अनुसन्धान न्ह्याकूगु दु । प्रसाई सामाजिक सञ्जालय् छगू शंकास्पद भिडियो सार्वजनिक या:गु ख: । उगु भिडियोय् प्रधानमन्त्री ओलीं कम्बोडियाया 'स्मार्ट एक्जिक्वाटा टेलिकम कम्पनी' इ ३२ अर्ब नेपाली तका अवैध रुपं लगानी या:गु द्वपं बियात:गु ख: ।

प्रहरीया कथं प्रसाईयात विद्युतीय कारोवार ऐन, २०६३ या दफा ४७ कथं अनुसन्धान न्ह्याकूगु दु । ऐनया प्रावधान कथं 'कम्प्युटर, इन्टरनेट लिसेंया विद्युतीय माध्यमय् प्रचलित कानूनपाखें निषेध यानात:गु सामग्री प्रकाशन व प्रदर्शन, वा सार्वजनिक नैतिकता, शालीनता विरुद्धया सामग्री वा सुयातं प्रति घृणा वा द्वेष न्यंकेगु वा छ्याच्व: बीगु, उत्पीडन

आकर्षित जूगु दु । प्रसाई सामाजिक सञ्जालय् त:गु दस्तावेज नक्कली जूगु खँ धाय्धुंकागु दु । नक्कली दस्तावेज दयेका: प्रधानमन्त्री ओलीयात अपमान याय्गु दुस्साहस थें च्वं । नक्कली दस्तावेज दय्केगु अपराधया निरतिं वयात 'रोजगारीइ मबीगु' द्वपं बीफु । राष्ट्रिय फौजदारी संहिता-२०७४ या दफा २७६ कथं अथे याय्मज्यूगु धयात:गु दु । उगु ऐनया दफा ३०६ कथं अपमान याय् दइमखु । यदि थुपिं अपराध पुष्टि जुल धा:सा निदैं कैद व विद्युतीय माध्यमपाखें अज्या:गु अपराध जूसा दच्छि कैदया व्यवस्था नं दु ।

सामाजिक सञ्जाल बांलाक छ् यलेगु ख:सा थुकिइ बांलागु हे लिच्च: वइ । थ:गु नुंग: खँ तय्गु बांलागु माध्यम ख: थौकन्ह्य सामाजिक सञ्जाल ।

[illegible]

किपुया जनतायात आर्थिक उत्पादन लिसे स्वाय्गु जुइ

किपु नगरपालिकाय् वइगु मंसिर १६ गते जुइगु मेयर पदया निितिं जुइत्यंगु उपनिर्वाचनयात कयाः नेकपा (एमाले) पाखे उम्मेवारी बियादीम्ह डा. सुरेन्द्र मानन्धर लिसे किपुया विकास निर्माण व भावी योजना बारे जूगु खँहाबल्हा ।

❖ किपु नगरपालिकाय् छिगु उम्मेदवारी छाय् ?

किपु नगरपालिका सांस्कृतिक रुपं शिक्षा, स्वास्थ्य, रोजगारीया ल्याखं महत्वपूर्ण नगरपालिका खः । थनया सम्पदा, थनया संस्कृति थनया सम्पत्ति खः । थुकियात अभ्र गथे यानाः समृद्ध याय्गु, किपुया हरेक नागरिकयात आर्थिक उत्पादन लिसे गुकथं स्वाय्गु खः धइगु थौंया मू न्ह्यसः खः । थनथाय् धाय्माःगु खँ छु धाःसा लिपांगु इलय् वयाः छम्ह बांलाम्ह सक्षम सबल नेतृत्वया अभावया कारणं छुं हे ज्या याय्फयाच्चंगु मदु । थ्व कथं धाय्गु खःसा किपू नगरपालिका दिशाहिन अवस्थाय् लानाच्चंगु व थुकियात दिशा बीगु निितिं किपुया नागरिक समाजया न्ह्यलुवा, बुद्धिजीवि विषय विज्ञपिनिगु सहमति सहभागिता सहकार्य यानाः नगरपालिका चले याय्त जिगु उम्मेदवारी खः ।

❖ किपुया विकास निर्माणय् छिगु योजना छु दु ?

न्हापां ला किपुया विकास निर्माणया निितिं थन दुपिं विज्ञतयूत जिमिगु नं नगरपालिका खः धइगु भाव गथे यानाः बीगु । नगरपालिकाया



डा. सुरेन्द्र मानन्धर, किपू नपा मेयर उम्मेदवार - नेकपा (एमाले)

विकास याय्गु सवालया आः नं जनप्रतिनिधि पासापिं दु । तर वय् कःपित छम्ह सक्षम व सबल नेतृत्वया अभाव जुयाच्चंगु कारणं यानाः थौं खास हे थःगु ज्या क्यने फयाच्चंगु मदु । वय्कःपिसं छुं धाय्गु यानाच्चंगु दु धाःसा छ थेंज्याःह मनु त्यासा जिमित ज्या याये अपू धाइ । अथे जूगु कारणं यानाः घरदैलो वनेगु इलय् नं आम मनूतय् धापू छु दु धाःसा किपुया एकताया निितिं सामूहिक प्रयत्नया

निितिं जिं हे त्यायेमाः धकाः वय् कःपिसं सुभेच्छा यानाच्चंगु दु । उकिया आधारय् नं जिं उम्मेदवार कथं न्ह्यःने वयागु खः । थनया शिक्षा, स्वास्थ्य, रोजगारी व पर्यटनया लिसे हरेक क्षेत्रय् गुगु ढंगं शिथिलता वयाच्चंगु दु । थ्व शिथिलतायात त्वाः थलाः किपु न्ह्यःने वन धइगु सन्देश बीत जिगु उम्मेदवारी खः ।

❖ आःया कार्यकाल धइगु निर्दया कार्यकाल खः ? थ्व निर्दया कार्यकाल

गुलि तक ज्या याय्फइ ?

थ्व निर्दया कार्यकालय् नं ज्या याय्फइ । ज्या याय्गु इच्छाशक्ति दुपित, ज्या याय्गु योजना दुपित निर्दयं नं यक्व खः । आः किपु नगरपालिकाया आः दुपिं दक्व जनप्रतिनिधिया दक्वसिया विश्वास कयाः किपुया हरेक क्षेत्रया विज्ञ, विशेषज्ञतय्गु विश्वास कयाः थ्व किपु छुं पार्टी वा मेयरया जक मखुसं सकलें किपुमितय् नगरपालिका खः धइगु विश्वास बियाः शिक्षा स्वास्थ्य रोजगारी पर्यटन आदि क्षेत्रय् भीसं सुधारया ज्या याय्फइ । व जक मखु थौं सहकारी तःधंगु समस्या जुयाः किपुमित नं प्रभावित जुयाच्चंगु दु । यदि जि निर्वाचित जुल धाःसा सहकारीयात गुकथं नियमन याय्गु ? गुकथं व्यवस्थित याय्गु ? सहकारीया हरेक ज्याखँयात गुकथं पारदर्शी याय्गु ? थ्व फुक्कं ज्या भीसं याय्फइगु अवस्था वइ । अथेजुयाः भीगु एजेन्डा धइगु नं थनया शिक्षा, स्वास्थ्य, रोजगारी व पर्यटन व स्थानीय वासिन्दायात आर्थिक उत्पादन लिसे स्वाय्गु खः । सहकारीयात गथेयानाः नियमन याय्गु थ्व तमाम एजेन्डा जिगु एजेन्डा खः ।

❖ छिं सहकारीया नियमन याय्गु धयादिल । गुलिखँ सहकारीया समस्या तसकं जटिल खनेदु । थुकिया पुर्नउत्थानया निितिं छिगु योजना छु दु ?

न्हापा ला सहकारीया समस्या गुलि गहिआइलय् दु धइगु खँ थुइकेमाल । अथेजुगुलिं न्हापां समस्या

म्हसिकेगु ज्या जुइ । दक्वं सहकारी समस्याग्रस्त जुल धइगु नं मखु । गुलिखँ सहकारी आः नं बांलाक न्ह्यानाच्चंगु दु । न्ह्यानाच्चंगु सहकारीयात अभ्र गथे यानाः मोटिभेद याय्गु ? चले जुइगु थाक्याच्चंगु सहकारीयात छु व्यवस्था याःसा जी धइगु बारे विवेचना याय्गु । वा संकटग्रस्त घोषणा हे जुइधुंक्कू सहकारीया निितिं नं स्थानीय सरकारपाखे छु गुगु नीति हय्फइ । गुकिं यानाः किपुमि जनताया गुगु बचत दु उकियात जोगे याय्फइ उकिया विषयया विज्ञत लिसे सहलह यानाः नेपाल सरकारया सहकारी विभागया लिसे जानाः सहलह याय्धुंकाः योजना दयेकाः भी न्ह्याःवनेगु जुइ ।

❖ अन्तय् छिगु निर्वाचन जनतायात छु धयादी ?

जि थ्वहे किपुया जनताया हितया निितिं, किपुया समृद्धिया निितिं मचाबलय् निसं राजनीतिइ, सामाजिक, आर्थिक क्षेत्रय् गुगु ढंगं क्रियाशील जुयाच्चनागु दु । थुकिं यानाः किपुमितय् जि प्रति तःधंगु भरोसा वा विश्वास दु । व हे विश्वासयात कायम यासं थ्व नगरपालिकायात गथे यानाः विकास याय्गु, अभ्र गथे यानाः समृद्धि याय्गु ? थनया आर्थिक उत्पादन लिसे थनया मनूतयूत गुकथं स्वाय्गु ? थ्व फुक्कं योजना सहित जिं मेयर पदय् उम्मेदवारी बियागु जुयाः आः वइगु मंसिर १६ गते जुइगु निर्वाचनय् जितः त्याकादीत जिं इनाप यानाच्चना ।

शपथ कयाः कन्हय्कुन्हु निसं एक्सनय् वनेफुम्ह जि हे जक खः

किपु नगरपालिकाय् वइगु मंसिर १६ गते जुइगु मेयर पदया निितिं जुइत्यंगु उपनिर्वाचनयात कयाः राष्ट्रिय प्रजातन्त्र पार्टीपाखे उम्मेवारी बियादीम्ह इन्जिनियर ध्रुव महर्जन लिसे किपुया विकास निर्माण व भावी योजना बारे जूगु खँहाबल्हा ।

❖ किपु नगरपालिकाय् छिगु उम्मेदवारी छाय् ?

थन जिं न्हापा २०६२ सालय् नं मेयर जुइधुनागु खः । उगु इलय् जि थ्यंमथ्यं निला जक मेयर जुयागु खः । २०६२ निसे २०८१ साल दथुइ भिंगुदैं बित । थुकिया दथुइ जूपिं मेयरपिसं नं छुं ज्या याःगु खनेमदु । वहे फल्चा व पुखू दय्केगु बाहेक मेगु ज्या याःगु खनेमदु । थ्व बाहेक मेगु ज्याया बारे जानकारी हे मदुगु खः ला ? ज्या मयाःगु कारणं यानाः थन छु धाय्गु यानाच्चंगु दु धाःसा उगु इलय् छं दय् कातःगु प्लान लिपा कन्टिन्यू मज्गु कारणं यानाः थ्व पालय् छकः छं ज्या यानाब्बू धकाः थनया जनतां आह्वान याःगु कारणं यानाः जिं उम्मेदवारी बियागु खः ।

❖ उगु इलय् छिं दय्कादीगु योजना छु छु दु ?

जिं उगु इलय् ६५ गू योजना दय् काःगु खः । उकिं मध्ये १७ गू लागू यानाः जिं क्वचाय्का । १७ गू मध्ये मेगु फुक्कं योजना लिपा वःपिं मेयरपिसं क्यान्सिल यात । गुगु योजना कार्यान्वयन याःगु

खःसा किपुया ख्वाःपाः पूर्वक हे हिले धुंकीगु खः । जिगु योजना कार्यान्वयन मज्गु कारणं यानाः जिं हाकनं उम्मेदवारी बियागु खः ।

❖ थ्व निर्दया कार्यकालय् गुलि तक ज्या याय्फइगु सम्भावना दु ?

उगु इलय् मुक्कं ५८ न्हिं चले यानाबलय् उलिमछि जिं ज्या याना धाःसा थ्व निर्दया कार्यकाल धइगु अप्ठः हे खः । गथे न्हापां जिं मेयर जूगु इलय् नगरपालिकाया कर्मचारीतयूत सुशासन तयेगु छ्वाः ई काल । अनं जिं दय्काःगु मेगु योजना धइगु लःया क्यापासिटी कयाः खः । उगु इलय् किपुमिपित लः त्वंकेत ३ करोड १९ लाखं क्वचाइगु ज्या आः तक सुनां नं मथिउगु जुयाः लःया ज्या याय्त दछि ई काइ । मेगु धइगु नगरपालिका दुने च्वंगु विशेष यानाः सरकारी स्कुलया मस्त च्यागू क्लास पास याय्धुंक्पिं ९, १०, ११ व १२ क्लासया जिं उमिगु डिमागय् इन्ट्रेस दुगु विषयलय् प्यदैं उमित ट्रेनिड बीबलय् उपिं थःगु विषलय् निपुणता हासिल याइ । उमिसं थःगु विषलय् बांलाक सय्की । गुकिं यानाः न्ह्याःसा स्वदेशय् च्वनाः ज्या याःसां जिउ । लोकसेवा ल्वाय्गु खःसा खुगुगु तहलय् ल्वाय् फइ । उकथं हे थःगु विषयलय् निपुणता हासिल याय्धुंकाः न्ह्यागु देशय् वसां नं ज्या याय्फइगु जक मखु इज्जत ध्यबा कमे याय्फइगु ल्याखं अज्याःपिं विद्यार्थी तयार याय्गु कुतः याय्गु जुइ । दैय् मुक्कं निसःम्ह



ध्रुव महर्जन, किपू नपा मेयर उम्मेदवार - राप्रपा

जक विद्यार्थी उत्पादन जुइ । थ्व योजना हाकनं नितान्त सरकारी स्कुलय् जक लागू जुइ । जिगु थ्व खँ न्यंबलय् थनया जनताया धापू छु धाःसा थन सरकारी स्कुलय् भी मस्तयूत मब्वंकेधुन । फुक्कं बोर्डिड स्कुलय् ब्वनाच्चंगुलिं यानाः स्थानीय जनतायात निितिं फाइदा जुइमखु धइगु धापू दु ।

❖ थ्वहे इवलय् स्वतन्त्र उम्मेदवार धकाः छगू हुइम वयाच्चंगु दु । थुकिया दथुइ आः जुइत्यंगु उपनिर्वाचनया निितिं किपुली नं भिंछम्ह स्वतन्त्र

उम्मेदवारपिसं उम्मेदवारी बियाच्चंगु इलय् राजनीतिक पार्टीतयूत गुलि तक लिच्चः लाकी ?

थुकिं जितः छुं नं कथंया लिच्चः लाकी मखु । थुकिं ग्यारेन्टी कयाः जिं छु धाय्फु धाःसा न्हापां माओवादी सशस्त्र युद्ध क्वचाय्काः एमाले कांग्रेसयात सुनां बुकेफइ धकाः धाःगु खः । तर बुकाः क्यन । अबलय् माओवादीया संगठन बल्लागु मखु । थ्व पालय् जि त्याइगु आधारत छु धाय्बलय् वंगु गुन्हु पुन्हबलय् गुगु सापारु पिहां वल ।

अबलय् क्रिटिसाइज याइगु धइगु सरकारं याःगु दछिया ज्यायात कया क्रिटिसाइज याइगु खः । उगु इलय् सुयागु क्रिटिसाइज यात धकाः स्वय्गु खःसा कांग्रेस, माओवादी व एमालेया याःगु दु । राप्रपायात कयाः मज्गू । राप्रपा गल्ती याःगु मदुगु कारणं यानाः क्रिटिसाइज जूगु मदु । जिं न्हापांनिसं राप्रपा पार्टीलिसे आवद्ध जूगु कारणं यानाः थुगुसी जिं उपनिर्वाचन जुइ स्वयां स्वला न्ह्यवीनिसं हलो चिं कयाः प्रचार यानाच्चनागु दु ।

❖ अन्तय् छिगु निर्वाचन क्षेत्रया जनतायात छु धयादी ?

आःया जनतायात जिं छु धाय् धाःसा तःधंगु दल वा चीधंगु दल मखु । जिपिं दनापिं मध्ये सक्षम सु वयात भोट बिउ । जितः धकाः नं धाय् म्वाः । राजनीतिक दलया वा स्वतन्त्र वःपित नगरपालिकाय् ल्यया छ्वय्गु खःसा उमितं म्होति नं खुला निसे दछि तक नगरपालिकाया हाउभाउ थुइकेत ई काइ । ध्रुव महर्जन जक थज्याःम्ह व्यक्ति खः कि गुम्हेस्यां न्हापा यानाः नं क्यनेधुंकल । शपथ कयाः कन्हय् कुन्हु निसं एक्सनय् वनेफुम्ह जि हे जक खः । अथेजुयाः न्हापा जिं ५८ न्हू नगरपालिका चले यानाबलय् छु यानाः धइगु दक्वस्यां सिउ । थुगु पालय् निर्दयं धइगु जिगु निितिं न्यादँया बराबर खः । जिं चान्हिं ज्या यानाः छु न्ववाना उकियात पूर्वकेगु जुइ ।

बेरोजगारी समस्या मज्यंकं किपुया विकास जुइमखु

किपु नगरपालिकाय् वइगु मंसिर १६ गते जुइगु मेयर पदया नितीं जुइत्यंगु उपनिर्वाचनयात कया: नेकपा (माओवादी) केन्द्र पाखे उम्मेवारी बियादीम्ह प्राडा. शिवशरण महर्जन लिसे किपुया विकास निर्माण व भावी योजना बारे जूगु खँल्हाबल्हा ।

❖ किपु नगरपालिकाय् छिगु उम्मेदवारी छाय् ?

किपु नगरपालिकाय् गुगु अव्यवस्था जुयाच्वंगु अवस्था दु उकियात निर्मुल याय्गु नितीं व किपुयात समुच्च विकास निर्माणया याय्त, थन दयाच्वंगु भ्रष्टाचार निर्मुल याय्त, सुशासन कायम याय्त जिगु उम्मेदवारी खः ।

❖ किपुया विकास निर्माणय् छिगु योजना छु दु ?

किपुया विकास निर्माणया सन्दर्भय् कया: किपुली गुगु लथालिंग जुयाच्वंगु दु उकियात व्यवस्थित याय्गु मू खँ जुल । अले मेता खँ थन खेलकुद मैदान लथालिंग जुयाच्वंगु दु । लँ लथालिंग जुयाच्वंगु दु । अज्याःगु अव्यवस्थित जुयाच्वंगुयात व्यवस्थित याय्गु जुल । लिसे किपुली त्रिभुवन युनिभर्सिटी नाप समन्वय याना: म्होतिं नं टियुया थीथी विभागय् ब्वनेगु लिसे कर्मचारी व त्रिवि सभाय् तकं किपुया प्रतिनिधित्व याकेगु नीति जिं नालागु दु । वयां लिपा किपु नगरपालिका दुने सकसितं सुविधा जुइकथं यातायात सञ्चालन याय्गु योजना दु । अथे हे फोहोर मुनेगु इवल्य् छँछा छँछा पतिकं ठेकेदारतय्सं ध्यबा म्हय्गु गुगु ज्या यानाच्वंगु दु । उकियात निःशुल्क याय्गु । अले लः व मतया न्यूनतम

शुल्क मिनाहा याय्गु जिगु योजना दु । अथे हे तुं स्वास्थ्य क्षेत्रय् थन विष्णुदेवी अस्पताल दु । उगु अस्पताल नां जकया जुयाच्वंगु दु । उकियात व्यवस्थित याना: २५ बेडया दय्केगु योजना दु । अथे हे तुं किपुयात पर्यटकीय विकासया नितीं पदयात्राया ज्याइवः दय्केगु । टुरिस्ट इन्फोरमेसन सेन्टरयात व्यवस्थित याना: गाइड, सम्बन्धित थासय् वनेमफुपिं पर्यटकया नितीं टुरिस्ट सेन्टरय् हे टिभी वा कम्प्युटरपाखे जानकारी उपलब्ध याकेगु योजना दु । लिसे पर्यटनया विकास याय्गु नितीं थन छ्मू सांस्कृतिक म्युजियम दय्केगु योजना दु । उक्तं हे जातीय म्युजियम नं थन नां जकया जुयाच्वंगु दु । थ्व जातीय म्युजियम व सांस्कृतिक म्युजियमयात दय्का: पर्यटक व्यवसाय थकाय्गु योजना दु । मेता सामुदायिक स्कुलय् व्यवसायिक विषय तथा: विद्यार्थीतय्त आत्मनिर्भर याय्गु खः । थ्व धइगु च्वय्या लेबल तक ब्वने मफुपिं विद्यार्थीयात स्कुल क्वचाय्वं छुं ज्या रोजगारी याय्फइ कथं हरेक स्कुलय् विषयगत ज्ञान बीगु योजना दु ।

❖ निर्दया कार्यकालय् गुलि तक ज्या याय्फइगु ताय्कादिया ?

थ्व निर्दया कार्यकालय् गुलि ज्या याय्फइगु खः उलि याय्गु खः । मेता खँ गुगु जिं निर्वाचनया इवल्य् प्रतिबद्धता प्वकागु दु उकियात पाइप लाइनय्सां तय्गु खः । गथे टियु विश्वविद्यालय टिचिङ हस्पिटलया छ्मू शाखा हया: थन सुविधा बीगु योजना नं दु । छा्य् धा:सा टिचिङ हस्पिटलय् जग्गा हे मदय्धुकल । तर थन आपालं जग्गा दु । थ्व योजना दछि निदँ ला क्वचाइ



प्रा.डा. शिवशरण महर्जन, किपू नपा मेयर उम्मेदवार - नेकपा (माओवादी केन्द्र)

मखु । थुकियात पाइप लाइनय् तथा: यंकेगु जुल । अले विकास निर्माणया चीचीधंगु ज्या ला दछि निर्दया दुने याय् फइ । उलिया दुने याय् मफइगु ज्यायात पाइप लाइनय् तथा: वनेगु । गथे कि सुख्खा बन्दरगाहनिसँ नैकाप तक लिंक रोड दय्केगु । थुपिं ज्या नं छक्वलं क्वचाइ मखु । थज्याःगु ज्यायात पाइप लाइनय् तथा: जूसां न्ह्याकेगु योजना दु ।

❖ किपुया वास्तविक समस्या छु खः ?

किपुया वास्तविक समस्या धइगु छ्मू लःया समस्या खः । सामुदायिक स्कुलया स्थिति बांमला: उकियात

सुधार याय्गु जुल । स्वास्थ्यया सुविधा अप्वय्केगु जुल । अले दकलय् तःधंगु समस्या धइगु बेरोजगारी खः । अले गबलय् तक बेरोजगारी समस्या समाधान जुइमखु उगु इलय् तक किपु नगरपालिका थहां वइ मखु । अले मेता तत्कालीन समस्या धइगु सहकारी मन्तयगु ध्यबा लित मबिउगु थौंकेन्ह्य् या तःधंगु समस्या खः । थ्व समस्याय् चीचीधंगु नगरस्तरीय सहकारीयात नगरपालिकां स्वयंमाःगु जुल । छु जुया: ध्यबा बीमफुगु खः उकिया नितीं छु याय्फइ धइगु खँय् नगरपालिकां बिचा: याइगु जुल । अन लिपा प्रदेश स्तरीय

सहकारी दु अज्याःपिनिगु नितीं म्होति नं ध्यबा लित बीगु बातावरण दय्केत जिगु योजना दु ।

❖ छिं ता: ई न्ह्यवनिसें थातं लानाच्वंगु लालपूजाया समस्या ज्यंकेगु खँ धयादीगु दु । थ्व गुलि तक सम्भव दु ?

माओवादी केन्द्रया नेतृत्वय् सरकार दुगु इलय् भूमि व्यवस्था, सहकारी तथा गरिबी निवारण मन्त्री शशी श्रेष्ठया पालय् छुं छुं लालपूजा बीगु ज्या याःगु खः । थुकिया नितीं जिमिसं आः नं कुतः यानाच्चनागु दु । विशेष याना: कर्मचारीतन्त्रं व मिले मजू थ्व मिले मजू धका: गुगु थाकेगु ज्या जुयाच्चन । उकियात समाधान याय्गु हे जिगु न्हापांगु प्राथमिकता कथं जिं कयाच्चनागु दु ।

❖ अन्तय् छिगु निर्वाचन क्षेत्रया जनतायात छु धयादी ?

निर्वाचन क्षेत्रया जनतायात धाय्गु खःला एमालेया स्थानीय सरकार स्वयंधुकल, नेपाली कांग्रेसया स्थानीय सरकार स्वयंधुकल उपिं पाखे जनता सन्तुष्ट मजू । किपु लथालिंग जुयाच्चन । विकास निर्माण जुयाच्वंगु मदु । भ्रष्टाचार खने दयाच्वंगु दु । थ्वपाखे मुक्त जुइगु खःसा आः छकः नेकपा माओवादी केन्द्रयात भोट बियादिसँ । निर्वाचनया इवल्य् गुगु प्रतिबद्धता जिं प्वकागु दु उकियात जिं पूर्वके । जिं किपुली छुं खनेदय्क हिउपा: हय् । किपु नगरपालिकायात व्यवस्थित याय् । सुशासन कायम याय् । उकिया नितीं थुगुसी छकः जितः मौका बियादिसँ धका: इनाप यानाच्चना ।

जितः निदँ मखु, खुला जक ई दुसा गाः

किपु नगरपालिकाय् वइगु मंसिर १६ गते जुइगु मेयर पदया नितीं जुइत्यंगु उपनिर्वाचनयात कया: स्वतन्त्र रुपं उम्मेवारी बियादीम्ह राजमान मानव लिसे किपुया विकास निर्माण व भावी योजना बारे जूगु खँल्हाबल्हा ।

❖ किपु नगरपालिकाय् छिगु उम्मेदवारी छाय् ?

आपास्यां जितः किपुली छिगु उम्मेदवारी छाय् धका: न्येनेगु यानाच्चंगु दु । अथे ला जि नीछ्दँ न्ह्यवनिसें राजनीतिइ मदु । जि थःगु सरसफाइ अभियानय् जक ध्यान बियाच्चनागु खः । थ्व नीछ्दँ तक जि राजनीतिइ मजुयासां नं नेपाःया कन्टेस्टय् सुनां नं नेपाः दय्केगु ज्या मयानाच्चंगु इलय् देय् भनभन अस्तव्यस्त जुयाच्चंगु इलय् थ्व नेपाः धइगु देय् दय्के मालधका: जिं उम्मेदवारी बियागु खः । मेता खँ छु धाय्बलय् जिं मानवीय फोहोर मजुइमा: धका: थीथी कथंया अभियान न्ह्याका: नं जिं थःगु हे पहलं जक ज्या याना: नं ज्या मजुगुलिं जि थः हे मेयर पदय् दना: अभियान व कानुनयात नापं यन धा:सा सफलता चूलाके फइ धका: उम्मेदवार बियागु खः । मेता खँ छु धा:सा थन लहनाय् जिं गुगु सामाजिक संरचना दय्का तइगु दु थुकियात



राजमान मानव, किपू नपा मेयरया उम्मेदवार - स्वतन्त्र

विदेशी पर्यटकतय्सं तकं बांला: धका: च्चछाःगुलिं याना: अथे खःसा थ्व किपु नगरपालिकायात हे लहना थें किपु, नगा, पांगा, भाजंगा, चोभा: व इताम्बयात सांस्कृतिक शहर दय्केगु जिगु योजना खः । थ्व सांस्कृतिक शहर दय्केबलय् हिं २० निसे ३० हजार

मनू दुकाय्गु योजना कथं जिं मेयर पदय् उम्मेदवारी बियागु खः । अथे हे किपुया गुगु ३० किलो मिटर मोटर चले जुइगु लँ दु । उकी नं प्रत्येक २० मिटरय् छम्ह सिमा व २० मिटरय् मतया पोल तथा: दय्केबलय् संसारया बांलाःगु शहर दय्के फइ धका: जिं मेयर पदय्

उम्मेदवारी बियागु खः ।

❖ यदि छि निर्वाचित जुल धा:सा छिगु कार्यकाल निर्दया दुने गुलि ज्या याय्फइ ?

जितः निदँ मखु, खुला जक ई दुसा गाः । संसारय् मन्तय न्ह्यपु छ्मू हे जुइ मखु । दक्कसिके बिस्कं बिस्कं न्ह्यपु दु । यदि जिं नेपाःयात निदँ तक न्ह्याकेगु खःसा सकस्यां नेपा: बांला: कि अमेरिका बांला: धका: न्ह्यसः न्यनी धुंकी ।

❖ किपुया वास्तविक समस्या छु ?

किपुया समस्या धइगु हे मदु । समस्या धइगु छु धा:सा मेपित समस्या जितः अवसर का । जि हरेक समस्या समाधान याइम्ह खः । अथेजुया: जिं संसारय् समस्या धइगु जिं मसिउ । मेपित समस्या खःसा व जिगु नितीं अवसर खः । थ्व समस्या समाधान याय्गु हे तःधंगु बांलाःगु खँ जुल ।

❖ छि त्याइगु आधार छु दु ?

जि त्याइ धइगु आधार आः जक मखु भिंखुदँ न्ह्यवनिसें किपुया हरेकसिया छँय् छँय्, लँयु लँयु बं पुना तयाम्ह खः । फुककं किपुमि जनतां सिउ । सायद पांगाय् च्वम्हेस्यां जिं थें उलि बं पुइ मखुनि । किपुली, चोभारय् च्वीपिं उलि बं पुइ मखुनि जुइ । जिं

बं पुइगु धइगु सफा जुइगु जुया: थ्व ज्यायात सकस्यां यय्काच्चंगु दु । मेता थ्व स्वतन्त्र उम्मेदवार धाःपिं भिंछम्ह जक मखु सछिम्ह दुसा जितः जितः । छा्य्धा:सा सुं नं स्वतन्त्रं भोट सालिगु धइगु जिगु छपा: नं भोट सालिगु मखु । वय्कःपिसं भोट सालिगु धइगु न्ह्याम्ह हे दंसां कांग्रेस एमाले माओवादीया भोट सालिगु खः ।

❖ अन्तय् छिगु निर्वाचन क्षेत्रया जनतायात छु धयादी ?

जिं किपु नगरपालिकाया जनतायात आः निसँ चुनावय् भोट कुर्कीबलय् न्हापा छिकपिसं परम्परागत रुपं गुम्हेस्यां जिमि बाः कांग्रेस गुम्हेस्यां जिमि पाजु एमाले, गुलिस्यां जिमि पासापिं माओवादी धका: गुगु लहलहय् भोट कुर्केगु न्हापाया चलन खः । आर्वनिसें सुं नं जनतां लहलहलय् वना: मखुसे दुनुगलं निसँ किपु नगरपालिका दयेकीम्ह इमान्दारम्ह, निरन्तर सामाजिक क्षेत्रय् दुम्ह, विश्वास दुम्ह, भ्रष्टाचार याइ मखुम्ह, पारदर्शी व सक्षम मनूयात ल्ययादिसं । जितः थुलि विश्वास दु कि नगरपालिकाया निर्वाचन लिपा छुं हे पार्टीइ जनतात दइमखु । वय् कःपिसं थःगु हे न्ह्यपु छ्यला: भोट बी धइगु आशा याना ।

सरकारय् जिमिगु पार्टी दुगुलिं जितः ज्या याये अःपुइ

किपु नगरपालिकाय् वडगु मंसिर १६ गते मेयर पदया नितिं जुइत्यंगु उपनिर्वाचनयात कयाः नेपाली कांग्रेसपाखे उम्मेवारी बियादीम्ह कृष्णमान डंगोल लिसे किपुया विकास निर्माण व भावी योजना बारे जूगु खँलाबल्हा ।

❶ किपु नगरपालिकाय् छिगु उम्मेदवारी छाय् ?

० किपु नगरपालिकाय् जिगु उम्मेवारी मुख्य रूपं किपु नगरपालिकाया विकासया नितिं खः । विकासया ज्या लँ जक दय्केगु मखु । पार्टी पौवा जक दय्केगु नं मखु । थन त्वाःत्वाल्य दुगु संस्कृति सम्पदायात ल्यंकेगु नितिं नं खः । मेता थःगु क्षेत्रया लिसे देश विकास याय्त शिक्षाया तःधंगु महत्व दु । उकियात आपूल हिउपाः हय्गु नं खः । अथे ला २०४६ साल लिपा शिक्षाय् यक्व विकास जुइधुंकूगु दु । उकिया लिसे स्वास्थ्य क्षेत्रया विकास नं खः । थौकन्हय् निजी स्वास्थ्य सेवा तसकं थिकेक ध्यबा पुलाः काये मालाच्वंगु दु । ध्यबा मडुपिसं निजी स्वास्थ्य सेवा कायेत थाक्याच्वंगु दु । अथेजुयाः जिं स्वास्थ्य क्षेत्रय् नं आमल हिउपाः हय्गु खँयात मू एजेन्डाया रूप्य् कयागु दु । उकिया नितिं किपू नगर हस्पिटल दय्काः किपु नगरपालिकां हे हस्पिटल सञ्चालन याय्गु योजना दु । अथे धइगु सरकारी रेटं हे स्वास्थ्य सेवा बीगु लक्ष्य कयागु दु ।

❷ किपुली न्हापा हे विष्णुदेवी अस्पताल दु ? हाकनं मेगु अस्पताल दय्केमाःगु आवश्यकता छाय् जुल ?

० मेगु अस्पताल दय्केगु मखु ।

खय्त ला थन छू किर्तिपुर हस्पिटल दु । कीर्तिपुर हस्पिटल किपु नगरपालिकाया ५२ रोपनी जग्गाय् छू संस्थां सञ्चालन यानाच्वंगु दु । अन प्यसः निसं न्यासः तक पुलाः स्वास्थ्य जाँच याय्माःगु अवस्था दु । लिसे अन थीथी सुविधा छ्यलेमाल धाःसा प्राइभेट हस्पिटल थें थिकेक ध्यबा पुला स्वास्थ्य सेवा काय् मालाच्वंगु दु । थथे थिकेक सेवा काय् मालाच्वंगु खँयात मनन यानाः थ्व स्वयां न्ह्यः नेपाली कांग्रेसपाखे निर्वाचित जुयादीम्ह मडुम्ह मेयर राजकुमार नकमीं निर्वाचनया इवल्य् ५० प्रतिशत छुट बीगु घोषणा यानादीगु खः । लिसे वय्कः निर्वाचित जुइधुंकाः उगु योजना लागू नं यानादीगु खः । गुगु सेवा आः तक नं न्ह्यानाच्वंगु दु । अले छिं नकतिनि धयादिल विष्णुदेवी हस्पिटल गुगु हस्पिटल १५ बेडया जुइमाःगु खः । २०५६ सालय् कांग्रेसं निर्वाचित जुयादीम्ह तीर्थराम डंगोल १५ बेडया हस्पिटल दय्केगु धकाः स्वीकृति कयाहःगु खः । उगु हस्पिटल थौकन्हय् लावारिस जुयाच्वंगु दु ।

❸ किपु क्षेत्रय् विकास निर्माणय् छिगु योजना छु दु ?

किपु क्षेत्रया विकास निर्माणया नितिं जिं छू नारा बियागु दु, 'शिक्षा, स्वास्थ्य व रोजगारी' । नापनापं भौतिक विकासय् गनं लँ मवन्थाय् लँ थ्यंकेमाल । दछियकं हे न्हिथं त्वनेगु लःया व्यवस्था याय्गु । खय्त ला २०४६ साल लिपा नेपाली कांग्रेसं लःया नितिं आपालं ज्या याःगु दु । मेलम्चीया खँ ल्हायय्गु खःसा अन्तरिम कालय्



कृष्णमान डंगोल, किपू नपा मेयर उम्मेदवार - नेपाली काँग्रेस

प्रधानमन्त्री जुयादिम्ह प्रधानमन्त्री कृष्णप्रसाद भट्टराईया परिकल्पना खः मेलम्चीया लः स्वनिगःया जनतायात त्वंकेगु । अथे खःसां नं वर्षाया इलय् निला स्वला लःया समस्या जुयाच्वंगु दु । अज्याःगु समस्या मदय्केगु नितिं किपुया ४ नम्बर वडाय् च्वंगु सिमभवाः हिति, नौमले दुधपोखरी अन लःया स्रोत दु । अनया लःयात व्यवस्थित यानाः किपुया फुक्कं वडाय् ३६५ न्हिं लःया अभाव मजुइ कथं ज्या याय्गु योजना दु ।

❹ आःया कार्यकाल धइगु निदँ जक

खः । निदँया दुने गुलि ज्या याय्फइगु सम्भावना खंकादिया ?

० निश्चित रूपं निदँया कार्यकाल चीहाकःगु खः । न्यादँ हे ज्या याय्दुगु खःसा ९० प्रतिशत ज्या पूर्वकेगु खः । तर निदँया दुने पूर्वके फइगु ज्या नं दु । पूर्वकेगु फइगु ज्यायात पूर्वकेगु जुइसा मेगु पूर्वके मफइगु ज्यायात न्ह्याकेगु जुइ । अले न्ह्याय् धुंकूगु ज्या मेगु चुनावय् निर्वाचित जूपित अपुइ । लिपा वइपित नं अपुइमा धकाः हे मास्टर प्लान दय्काः ज्या याय्गु जुइ ।

❺ किपुया पुलांगु वस्तीइ आपालं जग्गा धनीयाके लालपूर्जा मदु । थ्व समस्या समाधानया नितिं छु यानादी ?

थ्व सम्बन्धय् छु धाय्माःगु आवश्यकता दु । अथे ला २०५६ सालय् तक किपुया छम्ह हे जनतायाके लालपूर्जा मदु । अले उगु निर्वाचनया इवल्य् लालपूर्जा छू तःधंगु एजेन्डा जुल । सछिगू ज्या याय्गु स्वयां छू गतिलाःगु ज्या याय्गु । थ्व हे कथं यदि कांग्रेसपाखे सांसद निर्वाचित जुल धाःसा लालपूर्जाया समस्या समाधान याय्गु प्रतिबद्धता उगु इलय् प्वंकूगु खः । वयां लिपा हनेबहःम्ह तीर्थराम डंगोल निर्वाचित जुइधुंकाः छू आयोग नीस्वनाः आपालसित लालपूर्जा बीगु ज्या जुइधुंकूगु दु । आः नं छुं छुं लालपूर्जा इनेगु ल्यँ दनि । यदि किपुली जि निर्वाचित जुल धाःसा स्वंगुलिं तहलय् नेपाली कांग्रेसया सरकार दइगु जुयाः समस्या ज्यंकेत जितः अपुइ धइगु विश्वास दु ।

❻ अन्त्य छिगू निर्वाचन क्षेत्रया जनतायात छु धयादी ?

नेपाली कांग्रेसं किपु नगरपालिकाया विकास याय्त तःधंगु ज्या यानाच्वंगु दु । २०६९ लिपा निरन्तर स्वक्वः तक निर्वाचित जुयादीम्ह राजेन्द्रकुमार केसी, निक्वः तक त्याकादीम्ह पुकार महर्जनपिसं संस्कृति ल्यंकेत, देगः दय्केत आपालं बजेत हयाः विकास निर्माणय् योगदान बियाच्वंगु कारणं यानाः थ्वहे वइगु मंसिर १६ निर्वाचनय् जिं सिमा चिं लय् छाप तयाः अत्याधिक मत बियाः त्याकादीत इनाप यानाच्वना ।

मिसन ८४ या नितिं जिं छपा अप्पा तनेगु जुइ

वडगु मंसिर १६ गते जुइत्यंगु स्थानीय उपनिर्वाचनया नितिं नेकपा (एमाले) पाखे यँ महानगरपालिका वडा नं. १६ पाखे वडा अध्यक्ष उम्मेदवार बियादीम्ह लक्ष्मीरत्न तुलाधर लिसे उपनिर्वाचनयात कयाः जूगु खँलाबल्हा न्ह्यब्वयाच्वना ।

❶ वडगु मंसिर १६ जुइगु उपनिर्वाचनय् वडा अध्यक्ष त्याइ धकाः गुलि तक आशा यानादिया ?

जिगू ज्याकुथी वयाः निर्वाचनया विषययात कयाः गुगु अर्न्तवार्ता कयादिल । दकलय् न्हापां उकिया नितिं छिकपित सुभाय् देछाया । जि थ्व उपनिर्वाचनय् दनेस्वयां न्ह्यवनिसें सामाजिक क्षेत्रय् ज्या याना च्वनागु खः । जि सामाजिक ज्या यानागु ल्याखं जुइमाः थुगुसी जिगु पक्षय् जनलहर वयाच्वंगु महसुस याना । लिसे थनया दाजुकिपा तताकेहँपिसं नं जित साथ बिउगु जिं ताः उकथं हे थकालीपिसं जितः आर्शिवाद बिउथें जिं ताय्का च्वना ।

❷ अथे ला छि वंगु स्थानीय तह निर्वाचनय् नं निगूगु थासय् लानादीगु खः । सायद उगु इलय् पार्टी विभाजित जगुलिं छि निर्वाचित जुइ मफुत । थुगुसी अवस्था गथे दु ?

न्हापा नं चुनावय् वनागु इलय्

जिगु सामाजिक सक्रियता आः थें खः । तर गथे जुइ धाःसा चुनावय् वनेबलय् नकतिनि विभाजित जुयावःगु शक्ति चुनावया इलय् न्हापाया हे आंकादायात बियाच्वंगु अले नागरिक नं अलमल जुयाच्वंगु ई । लिसे उगु इलय् प्रदेशया छम्ह नांजाम्ह नेतृत्वं नं पार्टीयात ग्वाहालि मयाःगुलिं यानाः जि म्हो मत जक लिउने लाःगु खः । अबलय् नं जिं धाय्गु खःसा प्राविधिक रूपं जि बूगु मखु । छुं मतया ल्याखँ जक जि बूगु खः ।

❸ आःया कार्यकाल धइगु निदँया जक कार्यकाल खः । थ्व निदँया दुने गुलि ज्या याय्फइगु ताय्कादिया ?

स्थानीय सरकार धइगु थःगु छँय् न्ह्यःने च्वंगु सरकार धाइ । थ्व निदँया कार्यकाल धइगु वास्तवय् निदँया कार्यकाल मखु । जिगु पार्टी नालाच्वंगु ज्याइवः नीति, जिगु पार्टी 'समृद्ध नेपाल, सुखी नेपाली' दय्केगु धइगु गुगु नारा बियाच्वंगु दु । अथे मेता खँ जिगु पार्टी मिसन ८४ धकाः गुगु नारा बियाच्वंगु दु उकिं जिं छपा अप्पा तनेगु जुइ ।

❹ न्हापाया वडा अध्यक्ष यानाच्वंगु न्ह्याकाच्वंगु ज्या थौकन्हय् थातिं लानाच्वंगु दु । उकियात गुकथं कयादी ।

वय्कलं यानादीगु बांलाःगु ज्यायात जिं नुगः ह्वय्काः प्रशंसा



लक्ष्मीरत्न तुलाधर, चै-१६ वडा अध्यक्ष उम्मेदवार - नेकपा (एमाले)

याय् । वय्कलं न्ह्याकादीगु बांलाःगु ज्या गनं दिनाच्वंगु दुसा उकियात पूर्वकेगु जुइ । जि निर्वाचित जुल धाय् वं वय्कलं न्ह्याकूगु बांलागु ज्यायात मयाय्गु धइगु जुइ मखु ।

❺ छिगू वडाया मू समस्या छु दु ?

० थनया समस्या छु दु धकाः

मखु । अज्याःगु समस्या व्यवस्थापन गुकथं याय्गु धइगु मू खँ खः । जितः ताः थनया फुक्कं कथंया समस्या व्यवस्थापन याय्त जि सफल जुइ । समस्या धइगु वयां तुं च्वनी मू खँ वयात गुकथं व्यवस्थापन याय्गु धइगु खः । नेतृत्वया दायित्व नं थ्वहे खः ।

❻ थ्व चुनावय् जनतां छितः भोट बीगु छाय् ?

जि राजनीतिक मनु जक मखु, सामाजिक मनु नं खः । जिं थनया क्लब संघसंस्था लिसे नं स्वाः । उकथं हे ज्येष्ठ नागरिकया संस्था लिसे नं स्वानाच्वंगु दु । उथकं हे विपत्त व्यवस्थापन नापं नं स्वानाच्वंगु दु । थनया जनताया छुं नं कथंया समस्या जुल धाःसा जिपिं सक्रिय जुयाः ज्या यानाच्वनागु दु । अथेजुयाः थुकथं सक्रिय जुयाच्वनाम्ह मनूयात भोट छाय् बीगु धकाः मखु भोट छाय् मबीगु धकाः न्ह्यसः न्यनेमाःगु खः ।

❽ अन्त्य छिगू निर्वाचित क्षेत्रया जनतायात छु धयादी ?

अन्त्य जिं छु धाय्धाःसा वइगु मंसिर १६ गते जितः सूर्य मतदान यानाः त्यकादिल धाःसा वडां जुइगु सेवा छँय् छँय् थ्यंकेगु जुइ । युवातय्त स्वरोजगारय् स्वाय्गु जुइ । मिसापित सम्मान सहित सशक्तिकरण यानाः आयमूलक उद्योगय् स्वाय्गु जुइ । ज्येष्ठ नागरिकया नितिं दिवा आश्रम दय्केगु जुइ । विकास निर्माणयात सुशासन लिसे स्वानाः हरेक त्वाल्य दुगु उपभोक्ता समिति स्थानीय नागरिक लिसे सहलह यानाः वय्कःपिनिगु जिम्मेवारी ज्या न्ह्याकेगु जुइ ।

नेपाःया नोटय् नेपाल संवत तय्त गर्भनर तयार

लहना वाःपौ/ नेपाल राष्ट्र बैकया गर्भनर महाप्रसाद अधिकारी नेपाःया नोटय् नेपाल संवत् नं उल्लेख याकेत थम्हं पहल शुरु याना छ्वयेगु खँ कनादीगु दु । थुकिया लागिं आः न्ह्यु लटया नोट डिजाइनय् नेपाल संवत् नं छ्यय्के बीत थम्हं निर्देशन बीगु खँ नं वय्कलं धयादिल ।

नेपाःया नोटय् नेपाल संवत् नं उल्लेख याकेत इनाप यासैं वंगु नेपाल संवत् न्हूदैं राष्ट्रिय समारोह समिति-११४५ या प्रतिनिधि मण्डललिसे खँ ल्हासैं वय्कलं उगु खँ कनादीगु खः । उगु इलय् न्हूदैं समारोह समितिया नायः लिसें पुलांम्ह मन्त्री राजेन्द्र श्रेष्ठ वय् कःयात ज्ञापनपौ लःल्हासैं नेपाःया नोटय् नेपाल संवत् नं उल्लेख याय्माः धकाः थःपिसं ताःई न्ह्यवनिसें माग याना वयाच्चनागु खःसा थ्व माग आः वर्तमान गर्भनरया पालय् प्वनी धकाः आशा यानागु खँ कनादिल ।

गर्भनर अधिकारी न्यातका,



भित्तिका व सछि तकाया नोट छपाई प्रक्रियाय् वनेधुंकूगु खँ कँसें आः थ्व हे दैय् छापे याके त्पनागु न्यासः व द्वःछिवंगु नोटय् नेपाल संवत् नं उल्लेख याकेत कुतः यायेगु खँ कनादिल । थुकिया लागिं आः नोट डिजाइन याइबलय् उकी नेपाल संवत् नं तय्केगु बचं वय्कलं बियादिल । नोट डिजाइन याइबलय् उकी खने दयेक हे छुं परिवर्तन जुयाच्चन धाःसा उकियात मन्त्रिपरिषदय् यंकाः निर्णय

याय् मालीगु व सामान्य परिवर्तन जक जूसा राष्ट्र बैकया बोर्ड जक निर्णय याःसां गाइगु खँ नं गर्भनर अधिकारी कनादिल । लिसें वय्कलं नोटय् नेपाल संवत् उल्लेख याकेगु छुं समस्याया विषय मजुइगु बिचाः नं तयादिल । न्हूदैं समारोह समितिया नायः श्रेष्ठ यदि मन्त्रिपरिषद् यंके मालीगु अवस्था वल धाःसा अर्थमन्त्रीलिसे थःपिसं समन्वय याय्गु खँ कनादिल ।

उगु इलय् नेवाः न्ह्यलुवा मल्ल के. सुन्दर, प्रा.डा. नरेशमान वज्राचार्य व डा. पुष्पराज राजकर्णिकारपिसं नेपाल संवतयात फुक्क सरकारी दस्तावेजय् दुथ्याकेगु धकाः नेपाल सरकारं निर्णय याय्धुंकूगु कारणं आः नोटय् नं नेपाल संवत् उल्लेख याकेगु छुं समस्याया विषय मजुइगु बिचाः प्वकादिल । प्रतिनिधि मण्डलय् नेवाः देय् दबूया नायः पवित्र वज्राचार्य लिसें सुरेश किरण, सुजिव वज्राचार्य, ज्योति शाक्य व सिर्जन श्रेष्ठपिं नं ब्वतिकाःगु खः ।

नेवाः अर्गनाइजेशन अफ अमेरिकाया न्हूदैं ज्याइवः

लहना वाःपौ/ नेवाः अर्गनाइजेशन अफ अमेरिकाया ग्वसालय् वंगु शनिवाः नेपाल सम्बत ११४५ कच्छलागाः अष्टमी कुन्हु नेपाल सम्बत ११४५ न्हूदैं हनेगु व भिंतुना कालबिल नापं नेपाल संवत्या प्रवर्तक राष्ट्रिय बिभुति शंखधर साख्वाःयात हंगु दु । राष्ट्रिय बिभुति शंखधर साख्वाः प्रतिस्थानं थन अमेरिकाय् च्वंगु संस्थायात देछाः कथं बियाहःगु शंखधर साख्वाःया इवाता खतय् तयाः सुकुन्दा न्याली याःगु दु । ज्याइवलय् नेवाः बाजंया लिसें जात्रा यानाः न्ह्याःगु ज्याइवलय् डिसी महानगर लागया जःखः च्वपि थ्यंमथ्यं २५० नेवाः व गैर नेवाःपिसं ब्वति काःगु खः ।

नेवाः अर्गनाइजेशनया नायः महिन्द्रमान सिं प्रधानया सभापतित्वय् जूगु ज्याइवलय् अमेरिकाया नितिं



नेपाःया राजदूतावासया इकोनोमिकल काउन्सिलर योगराज पाण्डे मूपाहां कथं ब्वति कयादीगु खः ।

अथे हे यल मंकाः खलःया पुलांम्ह नायः लिसें नेवाः न्ह्यलुवा ऋषिप्रसाद श्रेष्ठ मूवक्ता कथं

नेपाल संवत व शंखधर साख्वाःया ध्वायुइकादीगु खः । निगूगु चरणय् जूगु ज्याइवसं न्हापांगु चरणय् भिंतुना कालबिल जूगु खःसा लिपांगु चरणय् थीथी सांस्कृतिक ज्याइवः जूगु खः ।

महागुथि बहुउद्देशीय सहकारीया २५ क्वःगु साधारण सभा



लहना वाःपौ/ ज्यापु समुदायया आर्थिक समृद्धि व उमिगु जीवन स्तर थकायेगु ताः तयाः संचालन याना वयाच्चंगु महागुथि बहुउद्देशीय सहकारीया २५ क्वःगु साधारणसभा व रजत दैं हंगु दु ।

वंगु शनिवाः विनायक मल्टि भेन्यु जूगु साधारणसभा व रजत दैं ज्याइवःया उलेज्या बागमति प्रदेशया कृषि तथा पशुपंक्षी विकास मन्त्री प्रकाश श्रेष्ठ यानादिल ।

अथेहे नेवाः देय् दबूया नायः पवित्र वज्राचार्य, ज्यापु महागुथि नेपाःया

नायः सत्यनारायण ङंगोल, महानगर समितिया अध्यक्ष पंचनारायण महर्जन व सहकारीया निवर्तमान अध्यक्ष मचाराजा महर्जन नं ज्याइवलय् थःथःगु नुगःखँ तयादीगु खः । महागुथि सहकारीया रजत महोत्सवया लसताय् सदस्यपनिगु नितिं निःशुल्क स्वास्थ्य शिविर, हिदान ज्याइवः नं जूगु खः । अथेहे दुजःपिंत नेपाल संवत् ११४५ या क्यालेन्डर नं इनाबिउगु खः । ज्याइवलय् सहकारीया ज्येष्ठ दुजःपिं, असल दुजःपिं लिसें सहकारी निरन्तर न्ह्याकेत २५ दैं न्ह्यवनिसें योगदान यानावःपिं लिसें

कर्मचारीतय्त नं सम्मान याःगु खः ।

महागुथि सहकारी आर्थिक दैं २०८०/८१ या लबः पाखें ११.५४ प्रतिशत लाभांश बिउगु खः । सहकारीया थौंक्न्हय् शेयर पुँजी २ करोड ८९ लाख दुसा जगेडा कोष ३ करोड १५ लाख ५६ हजार दु । अथेहे सरकारीपाखें आःतक ३४ करोड ८८ लाख ८९ हजार निक्षेप मुंक्गु दुसा २३ करोड ३१ लाख ८१ हजार त्यासा बियातःगु दु । साधारणसभां मचाराजा महर्जन मुसुंबहाःया अध्यक्षताय् न्ह्यु ज्यासना पुचः नं ल्यःगु दु । सर्वसम्मतिं ल्यःगु न्ह्यु ज्यासना पुचलय् न्वकु बाबुराजा प्रजापति, छ्याञ्जे कुलबहादुर महर्जन, दांभरि कुमार ङंगोलयात ल्यःगु दुसा दुजलय् राजभाइ महर्जन, पन्नारत्न महर्जन, गोविन्द महर्जन, गम्भीरमान महर्जन व अनिता ङंगोलयात ल्यःगु दु । अथेहे लेखा समितिया संयोजकय् रेणुका बासुकला व दुजलय् हिराकाजी महर्जन व नानीकाजी महर्जनयात ल्यःगु दु ।

हल्चोकय् भैरवाष्टमी विशेष पुजा

लहना वाःपौ/ भैरवाष्टमिया लसताय् हल्चोक आकाश भैरवय् तःजिक पूजा याःगु दु । पूजाया इवलय् समय् बजी ब्वय्गुयालिसें बहनि प्रसाद ग्रहणया ज्याइवः जूगु खः । दैय्दसं साधारण पूजा याना वयाच्चंगु खःसा थुगुसी समय्द्वः तयाः पूजा याःगु खः । थ्वहे वइगु वैशाख २०८२ वैशाख १ निसे लछियंकं जूगुलिं श्री हल्चोक आकाश भैरव भिर्निदैया जात्राया प्रचार प्रसार याय्गु तयारी कथं उगु पूजा जूगु खः ।



भीगु कान्तां दबदब पुचलं अर्केष्ट्रा न्ह्यब्वल

लहना वाःपौ/ भीगु कान्तां दबदब पुचलं वंगु मंसिर १ गते शनिवाः यैं महानगरपालिका १२ वडास्थित कुमाननिइ अर्केष्ट्रा न्ह्यब्वःगु दु । यैं मनपा १२ वडाया अध्यक्ष बालकृष्ण महर्जनया मूपाहांसुइ जूगु ज्याइवलय् न्हय्मून्हय्त्वाः मुसुंबहाःया मगुरु लिसे कान्तां दब दबका गुरु भाइराजा महर्जनयात विशेष सम्मान याःगु खः ।

ज्याइवलय् न्ववाय्गु इवलय् मूपाहां महर्जनं यैं मनपा १२ वडां संस्कृति सम्पदा संरक्षणया नितिं ल्याय् मह पुस्तां मौलिक बाजंयात बिस्कं कथं न्ह्यब्वःगुलिं लसता प्वकादिसैं सांस्कृतिक बाजंयात अभ्र विकास याय्त थःगुपाखे माःगु ग्वाहालि याय्त थः तयार दुगु खँ कनादिल ।

ज्याइवलय् ज्यापु महागुथि नेपाःया केन्द्रीय अध्यक्ष सत्यनारायण ङंगोल, ज्यापु महागुथि नेपाः यैं महानगर समितिया अध्यक्ष पंचनारायण महर्जन, ज्यापु संस्कृति विकास कोषया अध्यक्ष मंगलकृष्ण सिंह, कामपा १२ वडाया दुजःपिं पुष्परत्न प्रजापति, नानीहेरा

ङंगोल, श्यामकृष्ण खड्गीपिसं ब्वति काःगु खः । कामपा १२ वडाया विशेष ग्वाहालिइ अर्केष्ट्राया ७५ मह दुजः कलाकारपिसं थीथी बाजंया ग्वाहालिइ नेपाःया थीथी धून न्ह्यब्वःगु खः । अर्केष्ट्राय् स्वनिगलय् हालीगु थीथी ऋतु म्ये न्ह्यब्वःगु खः । गुकिं धनाश्री धुनं न्ह्याःगु खःसा मालश्री धून पुयाः क्वचाय्कूगु खः ।

अर्केष्ट्राया नितिं बाँसुरीया संयोजन भलननीया सुमन महर्जन, मूधिमेया संयोजन रमेश महर्जन,, खिं, पछिमाया संयोजन तःननिया प्रविण महर्जन, धोलक व मादलया संयोजन ज्याथाया नरेश प्रजापति, कान्ता दबदब, नगरा, दं व धीर्जकृष्ण बाजाया संयोजन तःननिया सुमन महर्जन व नाय्खिं, धाः व चिग्वः धिमेया संयोजन सम्यक ङंगोलं यानादीगु खः ।

ज्याइवलय् पुचःया छ्याञ्जे हिरारत्न प्रजापतिं लसकुस यानादीगु खःसा दांभरि अर्जुन ङंगोलं सुभाय् देछायादीगु खः ।

सरकारं जारी...

स्थानीय तहलय् सार्वजनिक बिदा बीत सरकारयात इनाप याःगु दु । आयोगं मेयर, उपमेयर, अध्यक्ष, उपाध्यक्ष व वडा अध्यक्षया चुनाव याय्माःगु स्थानीय निकाय वडा न्यंक सार्वजनिक बीत व सम्बन्धित स्थानीय तहया मतदातायात नं बिदाया व्यवस्था याय्त सरकारयात इनाप याःगु दु ।

उक्तथं हे मतदान न्ह्याःगु इर्लानिसैं मतदान क्वःमचाःतले मतदान स्थलया रुपय् कायम जुयाच्चंगु सामुदायिक विद्यालय, निजी विद्यालय, वडा कार्यालय, स्वास्थ्य संस्था, सामुदायिक भवन, औद्योगिक प्रतिष्ठान लिसे मेगु सार्वजनिक थायु निर्वाचन प्रयोजनया नितिं छ्यलेमाःगुलिं उकिया नितिं माःगु व्यवस्था मिले याय्त नं आयोगं नेपाल सरकारया संघीय मामिला तथा सामान्य प्रशासन मन्त्रालय मार्फत उपनिर्वाचन जुइगु फुक्कं स्थानीय तहयात निर्देशन बीगु निर्णय नं याःगु दु ।

उपनिर्वाचन-२०८१ या इवलय्

आचासंहिताया पालना लिसें छुं नं विषयस जानकारी वा गुनासो दुसा आयोगया कल सेन्टर ११०२ वा केन्द्रया फोन नम्बर ०१-५३२६३२६ य् तप्यंक स्वापू तयेत आयोगं इनाप याःगु दु ।

नेपाल संवत् ...

धयागु विश्वया नितिं हे छगू उदाहरणीय ज्या जूगु धासें थुगु लोककल्याणकारी ज्या तत्कालीन नेपाली समाजया नितिं थःथवय् हे छगू क्रान्तिकारी पलाः जूगु खँ धयादिल ।

बागमति प्रदेश सरकारया ग्वसालय् व शंखधर साख्वाः प्रतिष्ठानया संयोजन बागमति प्रदेशया पर्यटन संस्कृति मन्त्री विमल ठकुरीया अध्यक्षताय् ज्याइवः जूगु खः । ज्याइवलय् बागमति प्रदेश प्रमुख दिपकप्रसाद देवकोटा, मुख्यमन्त्री बहादुरसिंह लामालिसैं प्रदेश सरकारया मन्त्रीपिनि उपस्थिति दुगु खः । उगु ज्याइवलय् यैं महानगरपालिका, यल महानगरपालिका व मध्यपुर थिमि नगरपालिकायात सम्मान नं याःगु खः ।

छत्रपाटी चिकित्सालययात विद्युतीय सवारी साधन



लहना वाःपौ/ छत्रपाटी निःशुल्क चिकित्सालययात विद्युतीय सवारी लःल्हाःगु दु। यैय चिनियाँ दुतावासं छत्रपाटी निःशुल्क चिकित्सालययात ग्वाहालि विद्युतीय सवारी उपप्रधान लिसे सहरी विकास मन्त्री प्रकाशमान सिंह लःल्हानादीगु खः। ज्याइवल्य वय्कलं दूतावासया ग्वाहालिं निगू देय् दथुइ सम्बन्ध क्वातुगुया दसि खः धकाः धयादिल। मन्त्री सिंह नेपाःया जःलाखःला

देय् नापनापं अन्तर्राष्ट्रिय समुदाय नाप मैत्रीपूर्ण स्वापू तब्ब्याकाः न्ह्यावनाच्चंगु खँ धयादीगु दु।

उपप्रधानमन्त्री सिंहं हलिमयय् जलवायु ह्यूपाया बांमलाःगु लिच्चः अप्वयाच्चंगु इलय् चिकित्सालययात विद्युतीय सवारी लःल्हागुलिं सुभाय् देखानादिल। समुदाययात चिकित्सा सेवा बिइत क्लिनिक कथं पलिस्था जूगु थुगु चिकित्सालय सुविधां जाःगु अस्पताल थें हे सेवा बिया वयाच्चंगु

खँ नं वय्कलं धयादिल। नेपाःया निती चिनियाँ राजदूत छन सङं नेपाःया आर्थिक विकास व समृद्धिया निती चीन ग्वाहालि यानाः वयाच्चनागु खँ न्हयथंनादिसें निगू देय् दथुइ थीथी लागाय् मंकाः ज्यां माःगु कथंया लिच्चः काये फयाच्चंगु कनादिल। वय्कलं छत्रपाटी निःशुल्क चिकित्सालयपाखें दंक गुणस्तरीय स्वास्थ्य सेवा बिया वयाच्चंगु खँ न्यनाः थःत लसताय् खँ धयादिल।

नगरपालिकाको सम्बागत सुधार, समृद्ध कीर्तिपुरको आधार

भ्रष्टाचार विरुद्ध निरन्तर अभियान, गोलाकार भित्रको हथौडाका मतदान

नेपाल कम्युनिष्ट पार्टी (माओवादी केन्द्र)

कीर्तिपुर नगर समिति, कीर्तिपुर, काठमाडौं

चुनाव चिन्ह

नगर प्रमुख पदका उम्मेदवार

प्रा.डा. शिवशरण महर्जन

मो. ९८४१३३०४६६

चुनाव चिन्ह

गोलाकार भित्रको हथौडाका मतदान गरी

नेकपा। माओवादी केन्द्रको कीर्तिपुर नगरपालिकानगर प्रमुख पदका उम्मेदवार

प्रा.डा. शिवशरण महर्जनलाई विजय गराऔ।

नेपाल कम्युनिष्ट पार्टी (माओवादी केन्द्र) चुनाव प्रचार प्रसार कार्यालय

समृद्ध नेपाल, सुखी नेपाली हाम्रो अभियान

सुशासन र स्थिरताको लागि सूर्यमा मतदान

क. लक्ष्मी रत्न तुलाधर

उम्मेदवारः नेकपा (एमाले)

अध्यक्ष

का.म.पा. १६ वडा

सूर्य चिन्हमा मतदान गरी।

सम्पर्क ९८५१००२९६४

कीर्तिपुरको गृहार बदल्न, मतलाई मनसँग जोडी

पेशा राजनीति

सेवा राजनीति

म जनताको सेवक हुँ

ई. ध्रुव महर्जन

कीर्तिपुर नगरपालिकाका नेटर पदका उम्मेदवार

राष्ट्रिय प्रजासन्न पार्टी

१६ नं. वडाका जनताको आदेशमा

उपनिर्वाणमा जसले जे गरे पनि कलमले इतिहास लिपिबद्ध गर्नेछ।

जनताको आदेश हामीलाई स्वीकार्य छ, भ्रष्ट र बिचौलियालाई निषेध गर्नेछु।

बिचौलिया कमिशनकोरको अन्त नरोई, बडासाईं सर्वसाधारण मैत्री बनाऔ।

सेवाको नाममा मौलाएको कमिशन तन्त्रको अन्त नरोई, सेवालाई जनताको अधिकार बारे सचेतना जमाऔ।

बिकासको नाममा खरिने भ्रष्टाचारको अन्त नरोई, नागरिकलाई सचेत र जागरुक तुल्याऔ।

भनसुन तन्त्रको अन्त नरोई, सुशासन र जनमैत्री बनाऔ।

शब्द फालो बर्बा, मिलनसार, ईमानदार र सकृय नागरिकको

चुनाव चिन्ह कलम

नेकपा (एमाले)का उम्मेदवार

का.म.पा. १६ वडा अध्यक्ष उम्मेदवार

गिरि बहादुर मानन्धर

९८५०८६५३

आगो, हिटर वा गिजर प्रयोगमा होसियारी अपनाऔ

- आगो वा हिटर नजिकबाट नतापौ,
- कागज, कपडा जस्ता छिटो जल्ने खालका सामग्री आगो वा हिटरको नजिकै नराखौं,
- कोठामा आगो वा हिटर बाल्दा हावा ओहोरदोहोर हुने व्यवस्था मिलाऔं,
- हिटरलाई समय समयमा बन्द गर्ने गरौं,
- आगो वा हिटर बन्द गरेरमात्र सुतौ,
- आगो, हिटर र बिजुलीको काम सकिने वित्तिकै बन्द गरौं,
- गिजरलाई बाथरूम बाहिर खुला ठाउँमा जडान गरौं,
- बाथरूममा गिजरको प्रयोग गर्दा भेन्टिलेसन खुला राखौं,
- गिजर खोलेर लामो समयसम्म बाथरूममा नबसौं।



नेपाल सरकार

विज्ञापन बोर्ड